



# MANDATUM RECTORIS.

OB RECENS NATUM SERENISSIMUM  
*BURGUNDIÆ DUCEM.*



OS FRANCISCUS-NICOLAUS  
GUERIN, RECTOR Universi Studii  
Parisiensis, Omnibus & singulis ejusdem  
Universitatis Doctoribus, Magistris, Clie-  
tibus & Administris, SALUTEM.

QUOD unum post tot victorias & triumphos, post Pa-  
cem terrâ marique constitutam, Regni fortunæ ac securi-  
tati defuit, id tandem nobis indulgit *ex alto*, qui *format*  
*hominis nativitatem* Deus omnipotens. Natus est SERENIS-  
SIMO DELPHINO Filius, neque minoribus, quàm ipse  
olim Pater, votis expetitus, neque post breviores tempo-  
ris moras impetratus. In illius ortum arrectæ trepidabant  
Aula, Civitates, Provinciæ; exoritur Augustus Infans, &  
omnium spes & gaudia nascendo cumulat, qui totius Imperii  
desideria tam acri expectatione suspenderat. Nam quod  
pectus verè Gallicum non exultet faustissimo eventui, qui

Regiam Familiam lætitiâ perfundit, cum is sit nostræ Gentis, præter cæteras, animus, ut suorum prosperitate Principum magis, quàm suâ, moveatur? Licebat quidem antea felicem dicere LUDOVICUM, cui, ex quo regnare cepit, nullus effluxit annus, nullus dies, non aliquo singulari divinæ benignitatis pignore consignatus. Huic præstantissima Bello & Pace nomina communis Populorum admiratio detulerat. Restabat tamen, ut gloriosissimus Regum esset idem & beatissimus Parentum. Fruitur ille nunc suis votis nostrisque; fruitur eâ voluptatē, quâ nulla humanissimæ ejus indoli accommodatior. In multiplicatâ sobole multiplicatas sui imagines circà solium Pater & Avus intuetur. Dulce nobis quoque, charumque spectaculum! quippè eâ fiduciâ, quotquot nascantur è tali Sanguinis Auctore PRINCIPES, totidem gigni præsidia publicæ salutis.

SIC profectò sentit de suo DELPHINO universa Gallia, quæ crescentem per primos ætatis gradus animo secuta, sua nunc sibi auguria, suas spes confirmatas videt. Itaque effusis omnis Patria sensibus gratulatur juveni Principi, cui cùm abundè suppeteret, undè amaretur, & quòd LUDOVICI Filius, & quòd Unicus, his Natalium titulis titulos etiam adjunxit virtutum maximarum, quas idoneis suo culmini artibus constanter excoluit. Hinc illæ acclamationes, festique plausus, quos ille exceptos eodem, per quem meretur, affectu, lætus gestiensque refert Augustæ Conjugi, suis deliciis; undè agnoscat tenera felixque Mater, quibus Populis pretiosum Puellulum ediderit, quantòque suo illo tam amabili munere facta sit nobis ipsa pretiosior.

IN hac porro tam justâ communique lætandi causâ, nefas sit Illum oblivisci, per quem nobis datum est, ut

lætetur. Quamobrem jubemus in singulis Collegiis intrâ primam ab hujus Mandati promulgatione hebdomadam, cantetur Hymnus Eucharisticus *TE DEUM*. Simul Magistros Discipulosque nostros hortamur, ut piam Regis in Christi membra liberalitatem, quantum fas est, imitati, è suis quisque opibus aliquid effundant in sinum Pauperum : Pauperum Preces, quæ apud Deum potentissimæ sunt, Regio Infanti concilient, ut olim, cùm adoleverit, se in Pauperum maximè gratiam conservatum meminerit.

Præterea, quoniam æquum est nostræ Juventuti suæ lætitiæ, quæ bonos cives prænuntiat, aliquod quasi præmium rependi, quo hæc ætas afficiatur, volumus, dilatis ad diem à Nobis indicendum Ordinariis Supplicationibus Universitatis, & præclaræ Facultatis Artium Comitii, Ferias Academicas ad diem Lunæ Octobris undecimum prorogari; quo die, pro more, Sacrum Spiritui Sancto celebrabitur, & solitæ instaurandis Scholis Conciones habebuntur.

*DATUM* in Ædibus nostris *SORBONÆ - PLESSÆIS*, die Veneris vigesimâ-quartâ mensis Septembris, anno Domini millesimo septingentesimo quinquagesimo-primo.